

Awe nochi 8 or na Cas di Cultura

Den concierto varia, Armand Simon (piano) y Simon Gollo (violin)

ORGANISA pa Arubaanse Kunstring, awe nochi lo tuma lugar un concierto cu e internacionalmente famoso violinista Venezolano Simon Gollo y e inigualabel pianista Arubiano Armand Simon.

E programa ta consisti di piezanan cu lo deleita smak di un y tur: Mozart: Sonata KV 379; Saint-Saens: Havanaise (Habanera); Sarasate: Zigeunerweisen; Dvorak: Romance op.11 y finalmente, Grieg: Sonata op.45

Armand Simon ta Fundador y Director di Festival di Piano di Aruba. Como pianista gradua na Hulanda, el a acompaña varios artista di musica canta (e.o. Tica Giel) y instrumental, manera Alissa Margulis, German Marciano y

Nicaulis Alliey.

Armand ta Director di Da Vinci Academy di Arte.

Aruba a conoce Simon Gollo na 2006 tempo cu el a duna un concierto cu Abraham Abreu na beneficio di Aruba Scholarship Foundation.

Despues el a toca den diferente concierto aki. Simon Gollo ta Fundador y Director di e famoso Festival y Academia Nuevo Mundo di Maracaibo.

Simon Gollo a yega di toca den hopi teatro den Europa, Merca y paisnan di America Latino. Actualmente Simon Gollo ta biba na Merca caminda e tin un cuarteto di cuerda "Dalí" cu ya a toca den mas di 20 diferente estado di Merca.



Dalí ta un di solamente tres cuarteto di cuerda na Merca cu ta consisti di tocado Latino so.

Simon Gollo tambe ta pertenece n'e prestigioso orkestra di camera di e St. Luke's Church di New York. Tres bes pa aña Simon Gollo ta toca cu e orkestra di St Luke n'e mundialmente famoso

Carnegie Hall! Esaki ta un betrdadero oportunidad unico pa nos na Aruba disfruta di musica di calidad.

E concierto lo cuminsa 8 or.
Foto adhunto cortesia di Benjamin Romero.
clydeharms@yahoo.com